

Fiscal a exigí 1 año y 6 luna pa homber cu a viola muher

ORANJESTAD(AAN) -- E homber D.B. mester a presenta dilanti mesa berde pa responde pa su acto cometi.

D.B. ta worde acusa cu ariba 11 di Juni el a forza un muher bay cune y a viole.

D.B. a desmenti cu el a viola e muher y a bisa cu e conoce e muher pa basta tempo y cada vez cu e muher bin di exterior e ta bin keda cerca dje. Ademá D.B. a bisa cu ta voluntariamente e muher a bay cune.

Juez a remarca cu diferente testigo a mira con D.B. a forza e muher extranhera pa drenta e auto.

Mr. Mohamed a lesa declaracion di e victima kende a bisa cu el a kibra relacion cu C.B. pasobra B. kier a viola su yiu muher.

Segun e victima, e caso a tuma lugar mas o menos l'or di merdia na Calabas. C.B. a ranke na su cabey y hinke den auto y hibe na Natural Bridge. Na e sitio aki C.B. a dale cu mokete na su cabez y barica. Despues el a worde saca for di e auto y hiba banda di e barancanan caminda C.B. a amenase cu lo pasa auto ariba dje.

Despues nan a bay den e auto

caminda C.B. a force tene relacion sexual.

E victima a bisa C.B. cu tin mucho auto ta pasa y mihor nan bay cas di B. Na e cas e muher a pidi B. pa lage bay pero B. no tabata kier.

E muher a lucha pa no worde viola y a core sali for di e cas. Sin embargo na altura di un cas na Jaburibari C.B. a hinke den un cas y a tene relacion cune.

Juez a lesa e declaracion di dokter cu ta bisa cu e muher tabata tin rasca na ambos braza y tabata keha di dolor na su barica. Notable segun Juez ta

cu den pasado caba C.B. mester a presenta dilanti mesa berde pa un caso similar pero e tempo ey a sali liber.

C.B. a remarca cu por nota cu e declaracion di e testigonan ta contradictorio. Juez a enfatisa cu no ta importante e detayenan chikito, tur a mira con C.B. a forza e muher bay den auto.

Fiscal a enfatisa cu a keda legalmente proba cu C.B. a comete e delito. Mr. van Wijland a enfatisa cu ta trata aki di un caso serio. C.B. a hiba e muher contra su voluntad y a viole. E muher a bisa cu el a

kibra relacion cu C.B. y B. mester a respeta esaki.

Fiscal a exigí 1 año y 6 luna di prison pa C.B.

Abogado Flanders a enfatisa cu su cliente ta desmenti di a viola e muher. Si tabata berdad cu C.B. a forza e muher, dicon e otro testigonan cu a presencia esaki no a actua.

Flanders ta kere cu mas bien tabata trata aki di un discusion. Tambe ta asina cu no a keda legalmente proba cu C.B. a viola e muher.

Juez mr. Mohamed a bisa cu dia 16 di September e lo dicta sentencia.